

PM setuju penyediaan 500,000 unit RMM dalam RMK-12

11 Disember 2023, 10:52pm

Oleh: Rusyaidi Hafiz Shahid

KUALA LUMPUR: Perdana Menteri, Datuk Seri Anwar Ibrahim memaklumkan beliau bersetuju dengan sasaran Mesyuarat Majlis Perumahan Mampu Milik Negara (MPMMN) bagi penyediaan 500,000 unit rumah mampu milik (RMM) di dalam Rancangan Malaysia Ke-12.

Datuk Seri Anwar turut menekankan usaha mempercepat tempoh kelulusan pembangunan supaya dapat memangkinkan pelaburan dan memperbaiki tahap memudah cara perniagaan (ease of doing business) di Malaysia.

Ujar Anwar, langkah tersebut akan menarik dan memudah cara pemaju untuk menyediakan lebih banyak perumahan mampu milik.

Di samping itu, beliau turut menyatakan apa yang lebih penting adalah supaya pencapaian pembinaan RMM ini dapat terus membawa manfaat kepada rakyat.

“Konsep Perumahan Inklusif MADANI akan dijadikan teras pembangunan perumahan mampu milik.

“Usaha sama ini bermula dengan kerjasama Dewan Bandaraya Kuala Lumpur bagi penyediaan rumah untuk pelbagai golongan sasar di Kuala Lumpur dan turut akan dilaksanakan dengan agensi-agensi Kerajaan yang lain” ujar beliau menerusi perkongsian ciapan di laman sosial, X.

Beliau terdahulu mempengerusikan Mesyuarat Majlis Perumahan Mampu Milik Negara (MPMMN) Tahun 2023 yang telah dihadiri oleh Menteri-Menteri Besar/ Ketua-Ketua Menteri/ Exco Perumahan Negeri, Menteri-Menteri Kabinet serta wakil agensi penyedia perumahan yang terdiri daripada Agensi Kerajaan Persekutuan, Negeri dan Badan Berkanun serta pihak pemaju perumahan swasta.